

L' premie môtie

Ès vétchînt en ènne p'tête tieûm'nâtè, dains ènne souêchette de v'laidge que comptait è pô prés

tçhinze bacus. C'était in r'tirie yûe, mains lai fin airrivait è pô prés djainqu' en ènne romainne vie. È s' seuvniait qu' tiaind qu' èl était tot p'tét, son père djâsait quéques côps d' aivô des romains soudaîts qu' péssînt ch' lai vie. Laivoû qu' allînt tos ces soudaîts ? Ç' ât yos qu' se daivînt aidé dépiaicie po aichurie l' airriere di grôs romain l' Empire, d'lai sen di Rhîn. Les soudaîts aivînt dit en son père qu' n' împoétche tiu s' poéyait engaidgie dains l' aîrmée, pochque ç' n' était p' soîe d' dépiaicie des vrâs Romains dâs Rome djainqu' ch' lai frontiere d' l' Empire. Les pairoles de son père yi r'vegnînt mitnaint dains sai tête de djûene hanne. Pe sai tête était encoé pieinne des imaîdges de son afaince, tiaind qu' è voyait les foûes soudaîts,

les tchies, les mulats, les airmures, les lances, les bouçhies, ... In djoué, èl aivait meinme vu in romain tchèf chus son tchvâ.

In bé djoué, sai déchijion feut prije : è srait soudaît. Sai mère pûéré en aïppregnaint lai novèlle

pe èlle învotçhé les celtes dûes pe Mârs, l' romain dûe d' lai dyierre. Son père, lu, dié : mon bouêbe, t' és prou grant mitnaint po saivoi ç' que t' dais pe ç' que t' veus faire.

L' nové ladgionie feut enrôlé pe paitché d' aivô d' âtres soudaîts d' lai sen di nord. Mains mitnaint qu' èl était laivi, è s' musait bîn s'vent en son câre de tiere di Jura laivoû qu' les sîns traivaiyînt lai tiere. Lai grie l' pregnant chutôt tiaind qu' è daivait mairtchie, mairtchie encoé en poétchaint ch' son dôs d' pâjainnes tchairdges en pus d' lai lince, di yève, pe d' sai l' airtche. Des années péssainnent, è n' les saivait pus comptaie, djainqu' en ci djoué qu' ès tchoéyainnent dains ènne embuchtyaide, dains in p'tét vâ. Po l' premie côp èl aivait vu ces féroches Barbères qu' ritînt en rotte dains totes les sens, è les aivait ôyi boussaie yôs breuyets.

Les braives ladgionies eunent bél è épreuvaie d' se baïttre, ès feunent vaintçhu. Poi tchaince, note djûene jurassien s' poéyé tçhissie (è se d'mainde encoé adj'd'heu c'ment qu' çoli s' ât fait). È se r'trové tot d' pai lu dains in échpèce d' empoûesse, â moitan d' in p'tét bôs. L' temps d' ènne aivâche, è r'pregné ses l' échprit. Sains trop saivoi laivoû allaie, è paitché d' lai sen di meûçaint pe mairtché tot lai neût. Â maitîn, èl était en lai riçhatte d' ènne prou grôsse r'viere. Di temps d' doûes s'nainnes â moins, èl lai cheuyé d' lai sen d' l' aivâ. Tiaind qu' è trouvait des haibitès yûes, è fsait des détoués foûeche qu' èl aivait pavou d' vouere quéqu'un. In djoué, èl aivait épreuvè d' s' aïppretchie d' in hanne qu' graiboinnait tot d' pai lu in p'tét câre de tiere. Mains l' véye hanne s' était sâvè. Poi tchaince, sai féye qu' vadgeait des bèrbis pe trop laivi d' li était v'ni vés lu. Dains in mâçhat d' landyes, celte, laitîn, patois, ès s' botainnent è djâsaie ensoinne. Èl aïppregné qu' èl était en Sologne, raiconté qu' è v'niait di Jura, qu' è s' était enrôlé dains lai romaine ladgion, pe, hontou, è daivé djâsaie d' sai fute aïprés l' mâlhèy'rou l' aïccretchaidge d' aivô les Barbères. Lai djûene baïchatte l' aivait ravoétie drèt dains les eûyes, en aivait aivu pidie - mains â-t-ç' que c' était d' lai pidie ?- pe èlle l' envèllé tchie lèe, dains yote bacu, po l' in pô r'botaie chus pie.

È n' en r'vegnait p' d' se r'trovaie sietè d'vaint ènne grôsse tâle, â moitan d' lai tieûjainne, d'aivô lai djûene baïchatte, ses paires, ses grant-paires, pe chés pus p'têts frères è soeûrs.

An djâsont brâment en maindgeaint, pe lai grant-mère ne mainqué p' de dire en son hanne qu'

s'était sâvè en l' aïppretchie di Jurassien, qu' c' était in sâvaïdge. Aïprés lai nonne, lai baïchatte aïpparoyé ènne coutche ch' l' étrain dains in câre d' lai tieûjainne, laivou qu le ladgionie s' coutché, s' endremé pe rontché.

Tiaind qu' è s' révoiyé l' djoué qu' cheuyé, note djûene Jurassien r'trové lai Mairie (ç' ât d'inche qu' s' aipp'lait lai djûene baîchatte) qu' échâlait des faiviôles. È yi d'maindé in couté pe l' édéd dains ci traivaiye. Lai baîchatte poétchait âtoué di cô ènne fasse qu' dous croûejies bôs pendînt â bout. Qu' ât-ç' qu' vôs poétchèz li qu' èl oûejé yi d'maindaie ?

È bîn voili. L' annèe pèssée, sînt Maitchîn ât v'ni dains note v'laidge. È nôs é djâsè di Chricht qu' ât v'ni chus ç'te tiere, è nôs é dit qu' nôs l' daivîns prayie, pe chutot qu' nôs daivîns meu vétçhie ensoinne, c'ment des frères. Pe, èl é baptaiyie ces qu' l' aint v'lu. È m' é baptaiyie, pe m' é bèyie l' nom d' Mairie. Ç' ât l' nom d' lai mère di Chricht. Dâs ci djoué-li, i poétche ç'te p'tête crou qu' ât l' singne di Chricht. Pe vôs, qu' dié lai baîchatte, c'ment qu' vôs s' aipp'lèz ? Oh, vôs saites, moi, i n' aî p' de nom ! Tchie nôs, en l' hôta, an m' dit note Grôs, pochqu' i seus l' pus véye des afaints d' mes paires.

È v'nait d' dire çoli tiaind qu' lai mère d' lai Mairie airrivé en lai tieûjainne po aipparayie l' dénée. L' Grôs pregné l' graiboinnat pe rité dains l' tchaimp po édie l' grant-père. Dains sai tête è s' diait qu' è n' poéyait p' eurpaitchi tot comptant sains faire âtche po ces dgens qu' l' aivînt che bîn r'ci, pe ..., l' imaîdge d' lai Mairie regu'nait dains son tiûere !

Les djoués pèssainnent, l' Grôs n' était p' preussie de r'veni dains l' Jura. Èl était aidé l' premie po eûffie ses brais po traivaiyie lai tiere, po ch'gondaie c'te famille qu' l' aittieuyait che bîn. Â mois d' ot, ç' ât lu qu' aivait sayie tot l' biè tot d' pai lu, di temps qu' poi d'rie, lai Mairie aivait djaiv'lè pe dgierbè. Pe tchètche djoué, in pô d'vaint l' coutchie di s'raye ès fsînt les mayattes. È ravoétait lai baîchatte dôs son bé p'tét tchaipé d' étrain que t'nait lai drassie dgierbe di moitan en sôriaint. Mitnaint, ès s' dyînt te, nian pus vôs. L' drie soi des mouêchons, èls étînt â bout di tchaimp, tiaind qu' le Grôs dié : Vîns Mairie ! Nôs ains tot mouêch'nè, nôs s' dairîns in pô sietaie dôs ci tchène, en lai riçhatte d' lai Loire. È ronté l' bout d' ènne braintche di tchène qu' était tchoi, pe s' sietè tot contre lai baîchatte. Èl

ècmencé

d' taiyie l' bôs d'aivô son coutè. Mains, t' taiyes ènne crou qu' dié tot d' in côp lai Mairie ! È ô qu' dié l' Grôs en piaiquaint sai crou chus ç'té qu' était ch' lai goûerdge d' lai baîchatte. Pe, y' bèyaint in dou baîjat ch' l' araye, è y' mairmeujié : Mai p'tête Mairie, i t' t' ainme, pe c'ment qu' te m' és dit qu' te poéyôs baptaiyie, i te d'mainde d' me baptaiyie. En s' t'naint poi lai main, èls entraînent dains lai Loire, pe lai Mairie voiché d' l' âve ch' lai tête di Grôs en diaint « l' t' baptaiye Maitchîn, â nom di père, di fé di Sînt-Échprit ». Ès s' embrassînt encoé tiaind qu' des bieûs l' oûejés s' envoulainnent des époulats, pe qu' in couppe de dyirèts

pèssé drèt â d'tchus d' yôs têtes, en fsaint è fyottaie l' roudge cheûtes-me-djûene-hanne di tchaipé d' lai Mairie qu' envirvôté les crous des dous djûenes l' aimoéreus !

L' herbâ airrivé. Tot le v'laidge tchainté tiaind qu' le Maitchîn pe lai Mairie dainssainnent en lai grôsse fête qu' les Celtes fsînt aidé en l' airriere-séjon. À bon temps qu' cheuyé, l' djûene couppe r'venié dains l' Jura. Èl emmoinné d' aivô lu ç'te côtume des Celtes qu' an aippele d' nôs djoués, dains l' Jura, lai Sînt-Maitchîn.

Vôs Jurassiens qu' ainmèz vote càre de tiere, n' rébiètes chutot pe de r'tçhri les pieres que d'moérant d' l' oréj'noûere qu' aint mât'nè note Maitchîn pe sai fanne lai Mairie en l' hanneur d' ci sînt qu' les Celtes ainmînt poi d'tchus tot pochqu' èl aivait copè sai vèture po lai bèyie en in poûere diaîle qu' édgealait ! Bîn des siecles pus taîd, d' âtres sînts qu' sont v'ni dains l' Jura sont aivu tot ébâbis d' y trouaie l' oréj'noûere de sînt Maitchîn laivoû qu' an aivait dj' prâtchie lai boinne paiole, ç'té de Dûe.

J-M. Moine